

Kranzniederlegung VOR Rede / Rede verfasst in BÄRNDÜTSCH / in berndeutscher Sprache

Liebi Gedänkendi

D Schtadt Grenchen gedänkt hie de drü Manne, wo hüt vor 100 Jahr am letschte Tag vom Landesschtreik d Grenchner Todesopfer sy worde. Im tonvolle Glütt vo de drü öffentlech rächtliche Landes-Chilchene hei mir üs hie versamlet vor dere Gedänktafele. Mir hei üs hoffentlech ou innerlech gsammlt da schtill i üsne eigete Gedanke.

E Chranz isch jitze grad vom Stadtpräsident Francois Scheidegger und em ne Neveu, em Herr Noirjean, nidergleit worde zur Würdigung vo de Manne Hermann Lanz / vom Marius Noirjean und / vom Fritz Scholl.

« **Das Andenken der Gerechten bleibt in Gottes Segen.** » (Sprichwörter 10.7a)
« **Suche die Wahrheit und den Frieden** » (Sacharia 8.19)

Die drü Opfer sy erschosse worde vo Militärgwalt, wo damals **gäge** ds Volk agiert het. Hinterrücks niedergmacht für d Bevölkerig izschüchtere. E tödleche Macht-**Missbruch**.

Wieviel **LEID** het das Opferwärde vo drü Söhn verursacht ... no jahrelang ahaltends Leid ... unter dene Mütterere u Väterere.

« **Das Andenken der Gerechten bleibt in Gottes Segen.** » (Sprichwörter 10.7a)
« **Suche die Wahrheit und den Frieden** » (Sacharia 8.19)

Wieviel **SORGE** in de Gschwüschterte ou und de ganze Familiene het die militärischi Missetat usglöst? Die drü Manne sy wahrschinlech ou Geliebi gsy vo ihrne Fründinne oder Froue, sy Fründe, Mitarbeiter, Mitbürger u Kollege gsy. Alli die hei ou **glitte, viel glitte, mit-glitte**.

Wieviel **TRUUR** het daderdür no monatelang uf d Psyche vo de nache Mit-Mönsche u Familiene drückt?

« **Das Andenken der Gerechten bleibt in Gottes Segen.** » (Sprichwörter 10.7a)

Weler exischtänzielle **ENTBERIGE** het die Gwalttat zur Folg gha i dene Familiene u Verwandtschafte?

Warum so viel **TABUISIERIG** ir damalige Gsellschaft, so dass Jahrzähnte lang dene drü Manne kei Platz im öffentleche Bewusstsy isch ermügletet worde? 90 Jahr lang ... Ou das hei die drü Familiene wehrlos müesse hinäh bis anno 2008, wo du mit dere Gedänktafele hie am Zytplatz **ÄNDLECH ES ÖFFENTLECHS AADÄNKE** isch mügletet worde.

« **Suche die Wahrheit und den Frieden** » (Sacharia 8.19)

Um so achtigsvoller schpricht d Schtadt Grenchen hüt zum 100. Jahrestag ernöit ihri Würdigung us mit dere Chranzniederlegig **ÖFFENTLECH U OFFIZIELL**.

Ig lade jede einzeln/I Mitbürger/In ii, sini/ihri Würdigung in Demuet z erwise äbeso privat, wenn Dir a dere Gedänktafele verbi loufet. Würdiget **OU PRIVAT** immer wieder nöi, die drü Manne:

Hermann Lanz / Marius Noirjean / Fritz Scholl / und ihri Familiene.

« **Suche die Wahrheit und den Frieden** » (Sacharia 8.19)

Liebi Gedänkendi

Zum Schluss erhebe mir üser Blicke vo dere Gedänktafele und däm Chranz uf ... und mir sy üs bewusst:

Hüt u hie chönne mir schtah als Bürger und Bürgerinne, wo dörfe

LÄBE IN ERE ANDERE SCHWEIZ, als die Manne u Froue und Chind vor 100 Jahre. E Schweiz, wo als Schtaat zäme mir de Chilchene Manne wie Froue und Chinder

- **DANK** feschtgschribne **MÖNSCHERÄCHT** ärscht nimmt, und die Mönscherächt
- **DANK** inter-nationale **HÜETER-INSCHTITUTIONE** un-egoistisch cha mittrage!

Mir läbe

- **DANKBAR** im ene Bundesschtaat, wo diräkt-demokratisch siner BürgerInne aalost und laht la mitentscheide.

Mir läbe

- **DANKBAR** im Land, wo d Schtaatsgwalte in ere Machtballance sich gschiid stabilisiere.
- **DANK DÄM GENERALSCHTREIK** het sich üsi Schweiz i de Jahrzehnte dernah (bis 1971!) zu so gueter Demokratie chönne forme!

Mir alli dörfe vo dere wärtvolle Schwiz profitiere.

- **DANK** dene Arbeitnähler und Arbeitnählerinne, wo für Rächt und Grächtigkeit und für Wärschetzig sy häre gschtande,
- **DANK** dene Manne und Froue, wo sich - us Not drängt - mit Muet Ghör hei verschaffet für nüt anders als Grächtigkeit.
- **DANK DÄM GENERALSCHTREIK** isch dernah erwachet e Verbeserigs-Wille unter de politische und wirtschaftleche Machthabende.
- **DANKE**, säge mir all dene Arbeit-Gäbende, wo ou hüt no bereit sy für ne Verteilig vom Wohlschtand bis in die breiti Arbeit-Nähmende-Schar.

Die drü Gränchner Manne

Hermann Lanz / Marius Noirjean und / Fritz Scholl sy - so darf me`s us HISTORISCHEM Blick wahrnäh –

- «gschtorbe für ne grächteri Wält» (Zitat aus Gedenktafel) ufgrund vo ungrächter Ursach,
- gschtorbe am ne Zuekunft eröffnende Arbeiterprotescht,
- gschorbe damit e wäsentlech besseri Schweiz het chönne bildet wärde, syt däm Vorabe vor Demokratie.

Ig **DANKE** Öich Aawäsende für alli Offehärzlecheit!

Boue mir ZÄME witer a Wahrheit u Friede i MODERNER Demokratie!

Reformierter Pfarrer Peter von Siebenthal